

**UKA2025/85: Uunga siunnersuut: Nalunaaquttap aalajangersarneqarnera pillugu
Inatsisartut inatsisaata allanngortinneqarneranik Inatsisartut inatsisaat
(Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap
atorunnaarsinneqarnera)**

Inatsisartuni gruppimit saqqummiunneqartoq, Naleraq

aamma

**UKA2025/104: Uunga siunnersuut: Nalunaaquttap aalajangersarneqarnera pillugu
Inatsisartut inatsisaata allanngortinneqarneranik Inatsisartut inatsisaat
(Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap
atorunnaarsinneqarnera)**

Siumumit saqqummiunneqartoq

pillugit

siunnersuutit aappassaaneernejarneqarannut

Inatsisinut Ataatsimiititaliap

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq
Inatsisartunut ilaasortaq Kuno Fencker, Naleraq, siulittaasup tullia
Inatsisartunut ilaasortaq Karen-Marie Kyed Frederiksen, Demokraatit
Inatsisartunut ilaasortaq Bo Martinsen, Demokraatit
Inatsisartunut ilaasortaq Nivi Rosing, Inuit Ataqtigiit

UKA2025-mi ulloq 14. oktober 2025 siullermeerinninnerup kingorna ataatsimiititaliap
siunnersuutit misissorpai.

Siunnersuutip imarisaa siunertaalu

Kalaallit Nunaat ulloq 25. marts 2023, nal. 22.00 nalunaaquttat ingerlaqatigiiffiannut UTC-2-mut ikaarsaariarpoq. Tamanna Kalaallit Nunaanni nalunaaquttap nalinginnaasup nalunaaquttap akunneranik ataatsimik siuartinneqarneranik kinguneqarpoq.

Kalaallit Nunaat taamaalilluni nalunaaquttat ingerlaqatigiiffii eqqarsaatigalugit Amerikap avannarliup kangimut sineriaata Europallu kimmur sineriaata akornanni qiterpiaanni inissisimalerpoq sumiiffinnut pineqartunut tamanut piffissap assigiinnngissutaa nalunaaquttap akunneri pingasuullutik.

Nalunaaquttat ingerlaqatigiiffiannut UTC-2-mut Kalaallit Nunaata ikaarsaariarnerata kingorna paasinarsivoq innuttaasut ikigisassaangitsut nalunaaquttat ingerlaqatigiiffiat nutaaq ajornartorsiutitut misigisimagaat.

2024-mi aprilimi sapaatit akunnerisa marluk ingerlaneranni inuit atsiornerinik katersisoqarpoq tassanilu inuit 2.700-t missaasa nalunaaquttat ingerlaqatigiiffiannut UTC-3-mut (tassa nalunaaquttat ingerlaqatigiiffiannut siusinnerusukkut Kalaallit Nunaata annersaanut atuuttumut) ikaarsaariarnissaq, taamatullu aamma aasaanerani nalunaaquttap atorunnaarsinneqarnissaa taperserlugu.

Inatsisartut inatsisaata allanngortinneqarneranik Inatsisartut inatsisissaattut siunnersuutit marluusut kissaat tamanna tamarnik naammassivaat.

Taamaalilluni siunnersuutit nassatarissavaat Kalaallit Nunaanni nalunaaqutaq nalinginnaasooq nalunaaquttap akunneranik ataatsimik kinguartinneqarnissaa. Taamaalilluni seqineq Kalaallit Nunaata Kitaani nal. 12 missaani qutsinnerpaaffiminissaaq – taamaattorli Tunumiunngitsoq Qaanaamiinnngitsorlu. Ittoqqortoormiini seqineq nal. 10 missaani qutsinnerpaaffiminissaaq. Tasiilami seqineq nal. 11 missaani qutsinnerpaaffiminissaaq. Qaanaami seqineq nal. 14 missaani qutsinnerpaaffiminiissalluni.

Kalaallit Nunaanni sumiiffinni erseqqinnerusumik taaneqartuni nalunaaquttat ingerlaqatigiiffiiniq allanik aalajangersaanissamut Naalakkersuisut piginnaatitaanerat atuuttoq siunnersuutikkut ingerlateqqinneqarpoq. Taamaalilluni Danmarkshavnip aammalu Pituffik Space Basep Kalaallit Nunaanni nalunaaquttat ingerlaqatigiiffiinit nalinginnaasunit nalunaaquttat ingerlaqatigiiffiiniq allanik malinninnissaannut suli periarfissaqassaaq.

Kiisalu assersuutigalugu Qaanaami, Tasiilami aammalu Ittoqqortoormiini nalunaaquttat ingerlaqatigiiffiiniq allanik aalajangersaanissamut periarfissaqassaaq. Siunnersuummi UKA2025/104-mi sumiiffinni erseqqinnerusumik taaneqartuni nalunaaquttat ingerlaqatigiiffiiniq allanik aalajangersaanissamut nalinginnaasumik piginnaatitsissuteqarpoq. Siunnersuummi UKA2025/85-imi Qaanaami, Tasiilami aammalu Ittoqqortoormiini

nalunaaquttap ingerlaqatigiiffiinik aalajangersaasoqassappat tamanna najukkani innuttaasut tusarniaaffigereernerisigut pissaaq.

Kiisalu Danmarkshavn aamma Pituffik Space Base eqqarsaatigalugit aasaanerani nalunaaqutaq pillugu malittarisassanik Naalakkersuisut aalajangersaasinnaassapput.

Siunnersuutini marluusuni piffissaq atuutilerfiusussatut siunnersuutigineqartoq tassaavoq ulloq 24. oktober 2026, nal. 24.00.

Siunnersuutip Inatsisartunit siullermeerneqarnera

Oqaluuserineqarnerani isummat assigiinngitsut saqqummiunneqarput.

Partiit ilaasa isumatusaarnissaq kissaatigaat, tamatumani allannguinissamik aalajangertoqannginnerani nalunaaquttat ingerlaqatigiiffiata maanna atuuttup sunniutai nalilersoqqaarumaneqarlutik.

Kiisalu aasaanerani nalunaaquttap atorunnaarsinneqarnissaa aallarniutaasinnaanersoq oqallisigineqarpoq.

Oqaatigineqarpoq tusarniaanermut akissutit tiguneqartut aamma assigiinngitsunik isummorsorfiusut, tassa nalunaaquttat ingerlaqatigiiffiata allanngortinneqarnera innuttaasunit ataasiakkaanit qanoq misigineqarnersoq inummit inummut assigiinngitsumik sunniuteqarsinnaammat.

Kiisalu oqaatigineqarpoq nalunaaquttat ingerlaqatigiiffiat UTC-3-mut utertillugu allanngortinneqassappat tamanna inuussutissarsiortut aningaasaqarnerannut sunniuteqarnerluttussatut naatsorsuutigineqartariaqartoq.

Ilaatigut tamakku tunngavigalugit siunnersuutit ataatsimiititaliamit suliarineqartussanngorlugit innersuunneqarput.

Tusarniaanermut akissutit

Tusarniaanermut akissutit inatsisissatut siunnersuummut ilanngunneqarput, tamannalu Inatsisartut Siulittaasoqarfiata iluserititassatut piumasaqaataanut naapertuulluni.

Sassartitsinerit

Kattuffinnit, ingerlatseqatigiiffinnit peqatigiiffinnillu ukunangga aallartitat ataatsimiititaliamut sassartinneqarput: Air Greenland aamma Sulisitsisut.

Allakkatigut apeqqutit

Ataatsimiititaliap siunnersuummik suliarinninnerani atugassatut apeqqutit arlallit akissuteqarfigeqqullugit Naalakkersuisut Siulittaasuat qinnuigaa. Ataatsimiititaliap

apeqqutaasa aamalu Naalackersuisut Siulittaasuata akissutaata assilinerat isumaliutissiisummut matumunnga ilanngussatut ilanngunneqarput.

Siunnersuutit pisortanut aningaasaqarnikkut kingunerisassa

Siunnersuutit pisortanut aningaasaqarnikkut allaffissornikkulluunniit annertuumik kinguneqarnissaat naatsorsuutigineqanngilaq.

Taamaattorli tusarniaaffigineqartut assigiinngitsut tusarniaanermut akissummini minnerunngitsumik Danmarkimi Europamilu suleqatigisanik attaveqarnermi akornutaasinnaasut arlallit eqqumaffigeqqaat, nalunaaquttat ingerlaqatigiiffiata allanngortinneqarnissaa piviusunngortinneqassappat pisortanut pitsaanngitsumik kinguneqarsinnaasutut naatsorsuutigineqartariaqartut. Tassunga atatillugu tusarniaanermut akissutit ataatsimiititaliamit aamma innersuussutigineqarput.

Nalunaaquttalli aalajangersarneqarnera pillugu Inatsisartut inatsisaanni atuuttumi inatsit pillugu nassuiaatit tunngavigalugit imaluunniit inatsisissatut siunnersuutitut marluusunut matumani pineqartunut tusarniaanermut akissutit tiguneqartut tunngavigalugit siunnersuutit aningaasaqarnikkut kingunerisassaat siunnersuuteqartunit erseqqinnerusumik tagginneqarsinnaasimangillat.

Inuussutissarsiortunut aningaasaqarnikkut allaffissornikkullu kingunerisassa

Nalunaaquttat ingerlaqatigiiffiannut maannakkut atuuttumut (UTC-2) ikaarsarneq inuussutissarsiornermut aningaasaqarnikkut aqutsinikkullu sunniuteqarluarnissaa naatsorsuutigineqartoq Naalackersuisut naliliinikuupput. Tamanna tunngavigalugu nalunaaquttat ingerlaqatigiiffiannut (UTC-3-mut) atorunnaarnikumut uteqqinnissamut siunnersuutip inuussutissarsiornermut aningaasaqarnikkut aqutsinikkullu pitsaanngitsunik sunniuteqarnissaa naatsorsuutigineqassaaq. Taamatut naatsorsuuteqarneq tusarniaanermut akissutit tiguneqartut uppersarsarpaat. Pingaartumik Air Greenlandip pitsaanngitsumik kingunerisinnaasanit eqqugaanissaa naatsorsuutigineqartariaqarpoq. Tamatumunnga tusarniaanermut akissutigineqartut ataatsimiititaliamit aamma innersuussutigineqarput.

Nalunaaquttalli aalajangersarneqarnera pillugu Inatsisartut inatsisaanni atuuttumi inatsit pillugu nassuiaatit tunngavigalugit imaluunniit inatsisissatut siunnersuummut matumunnga tusarniaanermut akissutit tiguneqartut tunngavigalugit aningaasartuutissat taakku qanoq annertutigissanersut siunnersuuteqartumit missingerneqarsinnaasimangilaq.

Tusarniaanermut akissutit tiguneqartut tunngavigalugit aasaanerani nalunaaquttap atorunnaarsinneqarnissaanik siunnersuutip inuussutissarsiortunut aningaasaqarnikkut allaffissornikkullu pitsaanngitsunik ilaatigut kinguneqarnissaa naatsorsuutigineqartariaqarpoq.

Taamaalilluni Kalaallit Nunaanni aasaanerani nalunaaquttap atorunnaarsinneqarnerata ukiut tamaasa piffissami marsimi sapaatip kingulliup aamma oktobarimi sapaatip kingulliup

akornanni Kalaallit Nunaata EU-llu akornanni piffissat nikinganerat nalunaaquttap akunneranik ataatsimik annertusisissavaa. Nunat allat aamma aasaanerani nalunaaqutaqarfiusartut eqqarsaatigalugit Kalaallit Nunaani aasaanerani nalunaaquttap atorunnaarsinneqarnera taamatuttaaq ukiup ilaani piffissat assigiinnginnerannut sunniuteqassaaq. Nunarsuarput tamaat eqqarsaatigalugu ullumikkut nunat 70-it missaat aasaanerani nalunaaqutaqartarput. Nunanik taakkuninnga Kalaallit Nunaata niueqateqarnera nunanullu taakkuninnga angallannikkut attaveqarnera piffissap ilaani nalunaaquttap allangortinneqartarneratigut killilimmik ajornarnerulersinnaassasoq naatsorsuutigineqartariaqarpoq.

Sulisitsisut naliliipput Kalaallit Nunaanni nalunaaquttat ingerlaqatigiiffiat siunnersuutigineqartut UTC-3-mut allangortinneqarpat kiisalu piffissat ilaanni aasaanerani nalunaaquttap atorunnaarsinneqartarnera Europamut/Danmarkimut nalunaaqutaq akunnernik tallimanik nikingasalerpat tamanna Europami aamma Danmarkimi niuerfigisartakkatsinnik suleqateqarnitsinnut toqqaannartumik akornutaasinnaasoq.

Avatangiisinut, pinngortitamut inuillu peqqissusaannut kingunerisassai

Nalunaaquttat ingerlaqatigiiffiannut UTC -3-mut uteqqinnissamut siunnersuutip avatangiisinut pinngortitamullu kinguneqarnissaa naatsorsuutigineqanngilaq.

Innuttaasut peqqissusiat eqqarsaatigalugu nalunaaquttat ingerlaqatigiiffiannut UTC-3-mut uternissamik siunnersuutip pitsaasunik kinguneqarsinnaanera naatsorsuutigissallugu pissutissaqarpoq, naak tamakku annikitsuinnaassagunaraluartut. Kiisalu pitsaasunik kingunerisinnaasaanut ersarissumik uppersaatissaqanngitsoq allassimavoq. Tamatumunnga tusarniaanermut akissutigineqartut ataatsimiititaliamit aamma innersuussutigineqarput.

Innuttaasunut kingunerisassai

Nalunaaquttat ingerlaqatigiiffiannit UTC-2-mit UTC-3-mut ikaarsaariarnissamik siunnersuutikkut, taamatullu aamma aasaanerani nalunaaquttap atorunnaarsinneqarnissaanik siunnersuutikkut – ukioq tamaat ataatsimut isigalugu – ullaakkut ullup qeqqata siorna qaamasarnera annertusissaaq taamaaqataanillu ualikkut unnukkullu qaamasarnera annikillilluni.

Peqqissutsimut Naalakkersuisoqarfiup siunnersuummut matumunnga tusarniaanermut akissummini paasissutissiisutigaa nalunaaquttap akunneri ualikkut/unnukkut qaamaffiusut innuttaasut nalunaaquttap akunneri silami sammisaqarfigisaat annertusisissinnaagaat ilisimatusarnerit takutikkaat. Tamatumunnga tusarniaanermut akissutigineqartut ataatsimiititaliamit aamma innersuussutigineqarput.

Akerlianik aasaanerani nalunaaquttap atorunnaarsinneqarnissaanik siunnersuutip malitsigissavaa innuttaasut sininniarnikkut ajornartorsiuteqarnerup timittalu ingerlanerata allangortinneqarnerata malitsigisaanik aasaanerani ukiuuneranilu (nalinginnaasumik) nalunaaquttap nikisinneqartarneranik akornusersorneqarunnaarnerat.

Kingunerisinnaasai pingaarutilit allat

Siunnersuutip pingaarutilinnik allanik kinguneqarnissaa naatsorsuutigineqanngilaq.

Ataatsimiititaliap siunnersuummik suliarinninnera

Nalunaaquttat ingerlaqatigiiffiannut allanut ikaarsaariarnermut aammalu aasaanerani/ukiuunerani nalunaaquttamut ikaarsaariarnermut atatillugu innuttaasunut ataasiakkaanut malunnaatilimmik sunniutit inuit namminneq isumaannut annertuumik tunngassuteqartut ataatsimiititaliamit maluginiarneqarpoq. Kiisalu siunnersuutit siullermeerneqarneranni assigiinngitsunik isummertoqartoqatoq ataatsimiititaliamit aamma maluginiarneqarpoq.

Taamatutaaq assersuutigalugu inuussutissarsiutilinnut takornariartitsinermullu aningasaqarnikkut kingunerisassat tusarniaanermut akissuteqaatini arlalinni eqqumaffigeqquneqartut ataatsimiititaliamit maluginiarneqarpoq. Pingaartumik Air Greenland nalunaaquttat ingerlaqatigiiffiannut siornatigut atuuttumut utermermi eqqornerlunneqartussatut naatsorsuutigineqarpoq, tamatumalu pingaartumik nunatsinni angalanermi bilitsit akiinut aamma sunniuteqarnissaa naatsorsuutigineqarsinnaasoq ataatsimiititaliamit maluginiarneqarpoq.

Aasaanerani nalunaaquttap atorunnaarsinneqarnissaa immikkut eqqarsaatigalugu ataatsimiititaliamit oqaatigineqassaaq inatsiseqarnikkut maanna inissisimaneq malillugu aasaanerani nalunaaqutaq pillugu malittarisassanik aalajangersaanissamut Naalakkersuisut piginnaatinneqarmata, taamaalillutillu Naalakkersuisut aasaanerani nalunaaquttap atorunnaarsinneqarnissaa kissaatigineqarpat taamaaliornissaminnut taamatutaaq piginnaatinneqarmata. Kiisalu aasaanerani nalunaaqutaq EU-mit aamma atorunnaarsinneqarpat Kalaallit Nunaanni aatsaat atorunnaarsinneqartariaqartoq Naalakkersuisut isumaqartut ataatsimiititaliamit maluginiarneqarpoq.

Ataatsimiititaliap inassuteqaatai

Imm. 85-imut inassuteqaat:

- Ataatsimiititaliami amerlanerussuteqartut Demokraatineersut, Inuit Ataqtigiinneersut Atassummeersullu siunnersuut itigartinneqassasoq inassutigaat.

Tamatuma peqatigisaanik aasaanerani nalunaaquttap inatsit atuuttoq tunngavigalugu Naalakkersuisunit ulloq 1. januar 2027-mit imaluunniit kingusinnerpaamik ulloq 1. januar 2028-mi atuuttussanngorlugu atorunnaarsinneqassasoq amerlanerussuteqartut kissaatigaat. Tamanna tunngavigalugu amerlanerussuteqartut kissaataannik malinnilersaarnerlutik aappassaaneerinninnissamut akissuteqaamminni oqaatigeqqullugu Naalakkersuisut amerlanerussuteqartunit kaammattorneqarput.

- Naleraq ikinnerussuteqarluni oqaaseqaammik imaattumik saqqummiussivoq: Naleqqap maluginiarpaa, inatsisissatut siunnersuummi, amerlanerussuteqartut itigartitiniarnerminnik ilaatigut tunngavilersuutigigaat, Air Greenlandip oqariartuutigigaa nal UTC-3-mut utertinneqassappat aningaasanik annaasaqartussaallutik, uffa Air Greenlandip uppernarsarsimangikkaa UTC-2-mut ikaarsaarnermi isertitaqarnerulersimallutik. Timmisartornermik angallassinikkut billettit takuunnaraanni, nalunaaqutap allanngornerani akikillinngillat. Taamaakkaluartoq suliffeqarfiup UTC-3-imut uternerup kingunerisaanik isertitassanik annaasaqarsinnaaneramik oqariartuuteqarnera ataatsimiititaliami amerlanerussuteqartuniit itigartitinissaminnik annertuumik tunngavilersuutigineqarpoq. Atlantikoq qulaallugugooq timmisartuussinermi sulisut pilersaarusernerlu Danmarkimi najugaqarusummata - allaannginnami nunatsinni innuttaasut tamarmik, Air Greenlandip aaqqissuussineranut naleqqussassagut, uffa suliffeqarfik kalaallit aallaavigalugit aaqqissuussaani naleqqussartussaagaa.

Naleqqap sakkortuumik isornartorsiorusuppaa, qanoq ataatsimiititaliami amerlanerussuteqartut, nunatsinni innuttaasut, aalisartut piniartullu nalunaaqutap allanngornerani misiginerlussimasaat “misgissusiinnartut” nalilerneqarmat.

Uffa inuit ataasiakkaat misigissusiinnaannik tunngaveqanngitsaq.

Nunatsinni innuttaasut, nalunaaqutap allanngorneranik kingunerluuteqarput, saniatigullu aamma peqqinnissutsikkut ilisimatusarnerit arlallit uppernarsinikuuat seqernup ingerlanera, ulloq unnuarlu nunarsuup ingerlanera malillugu nalunaaqutarneq, sininneq, tarnikkut timikkullu peqqissutsimut toqqaannaq sunniuteqartartoq, misigissusaannartut taajorneqarsinnaanngilaq, ingammik nunami taamak tarnikkut atugarliorneq imminullu toquttarnerit ikiliartornatik inuiaqatitsinni ajornartorsiutaatigalugit “misgissunermiinnartut” taajorneqarsinnaanngillat.

Naleqqap maluginiarpaa, Inuit Ataqtigiinni, Demokraatini, aamma Atassummi ilaasortat inatsisartuni amerlanerussuteqarlutik innuttaasut kissaataat tunulliussagaat, inuussutissarsiortut tigussaasunik uppernarsaateqanngikkaluarlutik, nalunaaquttap eqqortumut utertinnissaanik, annaasaqarsinnaanerannik oqariartornerat salliukkaat.

Naleqqap inatsisissatut siunnersuutit akuerineqarnissaa suli attappaa.

Nunatta nalunaaqutaa nunarsuami inissisimanerput aallaavigalugu inissinneqassaaq, kalaallit aallaavigalugit nunarput aaqqissuunneqassaaq,

qaqugumulluunniit nuna allap allaffissornikkut sulieriaasaa aallaavigalugu nunarput ilusilersorneqassanngilaq.

Imm. 104-mut inassuteqaat:

- Ataatsimiititaliami amerlanerussuteqartut Demokraatineersut, Inuit Ataqtigiinneersut Atassummeersullu siunnersuut itigartinneqassasoq inassutigaa.

Tamatuma peqatigisaanik aasaanerani nalunaaquttap inatsit atuuttoq tunngavigalugu Naalakkersuisunit ulloq 1. januar 2027-mit imaluunniit kingusinnerpaamik ulloq 1. januar 2028-mi atuuttussanngorlugu atorunnaarsinneqassasoq amerlanerussuteqartut kissaatigaat. Tamanna tunngavigalugu amerlanerussuteqartut kissaataannik malinnilersaernerlutik aappassaaneerinninnissamut akissuteqaamminni oqaatigeqqullugu Naalakkersuisut amerlanerussuteqartunit kaammattorneqarput.

- Naleraq ikinnerussuteqarluni oqaaseqaammik imaattumik saqqummiussivoq: Naleqqap maluginiarpaa, inatsisissatut siunnersuummi, amerlanerussuteqartut itigartitiniarnerminnik ilaatigut tunngavilersuutigigaat, Air Greenlandip oqariartuutigigaa nal UTC-3-mut utertinneqassappat aningaasanik annaasaqartussaallutik, uffa Air Greenlandip uppersarsarsimangikkaa UTC-2-mut ikaarsaernermi isertitaqarnerulersimallutik. Timmisartornermik angallassinikkut billett takuunnaraanni, nalunaaqutap allanngornerani akikillinngillat. Taamaakkaluortoq suliffeqarfiup UTC-3-imut uternerup kingunerisaanik isertitassanik annaasaqarsinnaanerani oqariartuuteqarnera ataatsimiititaliami amerlanerussuteqartuniit itigartitinissaminnik annertuumik tunngavilersuutigineqarpoq. Atlantikoq qulaallugugooq timmisartuussinermi sulisut pilersaarusiornerlu Danmarkimi najugaqarusummata - allaannginnami nunatsinni innuttaasut tamarmik, Air Greenlandip aaqqissuussineranut naleqqussassagut, uffa suliffeqarfik kalaallit aallaavigalugit aaqqissuussaani naleqqussartussaagaa.

Naleqqap sakkortuumik isornartorsiorusuppaa, qanoq ataatsimiititaliami amerlanerussuteqartut, nunatsinni innuttaasut, aalisartut piniartullu nalunaaqutap allanngornerani misiginerlussimasaat “misgissusiinnartut” nalilerneqarmat.

Uffa inuit ataasiakkaat misigissusiinnaannik tunngaveqanngitsoq.

Nunatsinni innuttaasut, nalunaaqutap allanngorneranik kingunerluuteqarput, saniatigullu aamma peqqinnissutsikkut ilisimatusarnerit arlallit uppersarsinikuuat seqernup ingerlanera, ulloq unnuarlu nunarsuup ingerlanera malillugu nalunaaqutarneq, sininneq, tarnikkut timikkullu peqqissutsimut toqqaannaq sunniuteqartartoq, misigissusaannartut taajorneqarsinnaanngilaq, ingammik nunami taamak tarnikkut atugarliorneq imminullu toquttarnerit ikiliartornatik

inuiaqatitsinni ajornartorsiutaatigalugit “misgissunermiinnartut”
taajorneqarsinnaanngillat.

Naleqqap maluginiarpaa, Inuit Ataqatigiinni, Demokraatini, aamma Atassummi
ilaasortat inatsisartuni amerlanerussuteqarlutik innuttaasut kissaataat
tunulliussagaat, inuussutissarsiortut tigussaasunik
uppernarsaateqanngikkaluarlutik, nalunaaquttap eqqortumut utertinnissaanik,
annaasaqarsinnaanerannik oqariartornerat salliukkaat.

Naleqqap inatisissatut siunnersuutit akuerineqarnissaa suli attappaa.

Nunatta nalunaaqutaa nunarsuami inissisimanerput aallaavigalugu
inissinneqassaaq, kalaallit aallaavigalugit nunarput aaqqissuunneqassaaq,
qaqugumulluunniit nuna allap allaffissornikkut sulieriaasaa aallaavigalugu
nunarput ilusilersorneqassanngilaq.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni inatsisissatut siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Karen-Marie Kyed
Frederiksen

Bo Martinsen

Nivi Rosing